


黔

記







記

點

李宗昉著

編主五雲王

編初成集書叢

記

黔

中華民國二十五年十二月初版

著者 李宗昉

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

密

修

本館據問影樓輿地
叢書本排印初編各
叢書僅有此本

嘉慶十八年。今少宰山陽李公。以贊善督學黔中。時巡撫某公。以黔中地非甚寡糧數。乃不敵一二縣於江蘇。疑士民田多隱匿。擬奏請全省丈量田。公聞之。駭甚。而無說以折之也。而某公自以不加賦。而田得增多。賦倍出。爲

國家計久長。意自得。銳甚。時時籌經費。調屬吏。議設官局事。奏請卽行。有日矣。公初至黔。時以黔中文獻隱失。府縣志多缺不修。無以稱

聖天子一道德廣文思之意。乃檄各學校官。訪鄉士大夫。藏金石圖史歌謠志乘。涉黔事者。最上學使鈔錄發還。而遂得錄御史包祚永丈田奏。蓋乾隆初。貴州學使鄒一桂請丈田。而包公駁之。得

俞旨。公得此奏。則大喜。示某公曰。丈田議。學臣嘗奏之。駁不行。今公發之。必援前議解其駁。議乃得申。不然。部議必駁公。如曩時。且以匿前駁不奏。詰公。卽公無辭。某公見奏。驚曰。吾不意害乃如是。非包君黔人。固無由知。請勿復言丈田事。立廢局。罷所調吏。後他巡撫來。以事遠。文書多遺失。恐後萌芽。故列上其事。而公爲少司徒。乃得援前議。詳復之。事定不行。方公檄學官上人家所藏書。惟網羅放失舊聞。將編爲黔記。補田侍郎黔書之缺而已。而遂得包御史奏。以回某公之意。以安黔中之民。不然。黔中固多山。少平地。民或以虛占不毛之土。而實奪其可耕之田。又以胥吏上下之手。而丈其高下不可準之地。使賄成於胥吏。民財耗。而官田不增。其害小。苟民田奪。而官田遂增。椎剝其膚髓。爲

國家經常之規。則一朝而伏萬世之憂。不難矣。而黔之民。得至今宴然無憂。非公之功哉。此一事也。於是

書、足千古矣。若夫鉅細悉備，裨益雅俗，有華陽志風土記之遺風。覽是書者，當自得之，而有取焉。道光十四年甲午二月，門下士上元梅曾亮謹序。

黔記卷一

清 山陽李宗昉芝齡著

貴州通志。近今八九十年。未加增葺。以今所見聞考之。纔十得四五耳。余歷試六郡。惟興義府。見南籠舊志刊本二卷。亦多缺略。草志。則有平越府志。已缺一卷。餘惟安順之安平。興義之安南。有草稿數冊。仍抄撮通志。殊無新得。荒略如此。考古者。將何所徵信焉。

省城外。東南近城垣。新建君子亭。爲陽明也。

海昌。沈文學毓孫。號蘋濱。字于澗。僑金筑。能詩。其謁王文成公祠曰。荒涼祠宇對斜曛。儒術千秋大雅羣。朱陸之間分一席。孫吳而外有三軍。牂州古驛生春草。越國青山隔暮雲。當日龍場曾瘞旅。他鄉誰忍讀遺文。旅店曉起云。荒城一夕小淹留。喔喔晨雞動客愁。五夜霜風消宿酒。四山煙瘴壓征裘。清衙此去依嚴武。逆旅何人識馬周。閨裏金錢如問卜。春分前已過思州。

沔陽。張蓮濤錫穀。署開泰縣令。有秀才薛上國。素不至縣廷。忽通謁。長跪而泣。問何爲。對以徑來一瞻好官。越日上國死。懷手書遺子姪。戒毋爲不善。中曰。縣公清廉寡欲。其後必有達人。所藏張鴻臚銅雀瓦硯。可持贈公子。勸其學。蓮濤受其硯。以名其齋。早熟稻。名蟬鳴。俗呼早市香。

雞窠所生。下有白蟻。聚土如蜂房。又名蟻奪采。時人必蹲。來歲可再得。立則否。羊肚菌亦生細草中。刺梨野生。幹如蒺藜。土人多種于籬落。可辟猛獸。其花如茶蘼。結實如小榴。色黃多刺。味甘微酸。小兒食之。消積滯。搗汁入蜜。煉之可爲膏。各郡皆產。越黔境乃無。又一種重胎豔花。紅紫間色。可蒔爲玩。名送春歸。或云刺梨熟。虎來食。

蘇草。卽燂麻。其葉類麻。多毛刺。生離落溪崖間。刈並豨薺煮飼猪甚肥。沃湯浴體。可療瘋瘡。墨莊漫錄云。一種惡草。羅生於野。土人呼爲蘇麻。其枝葉拂人肌肉。卽成瘡泡。潰爛久不能愈。

白香山詩。蘇草四時香。俗名火麻草。

前胡。遍生山谷間。春初吐葉。土人採爲菜。味極香。俗名羅鬼菜。又名姨媽菜。黔中婦女好遊。相識卽通往來。呼爲姨媽。飯則必設此。故名。

木芙蓉花。一日三變。由白而紅。至深紅。極豔。

女紅。極精。繡蟒。不減于顧氏露香園者。

夾酒。初用釀燒酒法。再用釀白酒法。乃成。

啞酒。一名重陽酒。以九日貯米于甕而成。他日味劣。以草塞瓶頸。臨飲。注水平口。以通節小竹。插草內。吸之。視水容若干。徵飲量。苗人富者。以多釀此爲勝。

菜豆腐。入碎菜于豆汁成之。又一種。名連渣菜豆腐。又有苡灰豆腐。以苡梗燒灰。罨過宿。食之極嫩。又有

磨芋豆腐。劓天南星磨漿。以石灰蒞灰水點成。性寒質勁。能祛風化痰解煤毒。造者每閉戶避人。有說鬼者。則不成矣。又名鬼芋豆腐。或云。卽藥品中土芋也。

黔人好食臭腐物。每歲三月。洗白菜。鋪巨桶中。加以小米。層菜層米。滿則以巨石壓之。至五月始開。氣極惡。沸湯食之。頗以爲美也。其汁治泄瀉痢疾甚効。土人呼餹菜。

貴陽竹枝詞三十首。作者不知誰何。擇錄數首。以志土風。最堪憑眺。是東山。放着晴天好去頑。今日遊人定多少。倩郎幫妾理釵環。方言放着巧。趕現成之謂也。清明上冢近城隈。縞素衣裳淡粉腮。聽得阿誰憐少婦。汗巾揩淚首重迴。中秋月色最清佳。鑼鼓喧闐笑語譁。喬扮仙姬來送子。背兜兜個大倭瓜。妾轎迎來郎拜堂。郎忙去謝妾爹娘。合歡三日娘看妾。滿月回門妾伴郎。板凳條條坐綠鬟。孃孃廟看豫陞班。今朝比似昨朝好。拷火連場演下山。孃孃廟在指月堂。拷火下山花戲也。

杜鈞。字景宋。號藕莊。江西新建人。以進士。爲雲南太和縣令。改易門。擢鎮雄牧。以事謫戍貴陽。能詩。漢軍劉永安。雲夢萬化成。大埔饒重慶。並以州縣罷。日相與吟詠。重慶作落花落葉詩八章。咸屬和。鈞成八十章。人傳誦之。

王覺蓮。字夢白。號醒齋。貴筑人。初覺蓮父母。嘗祈子於旌陽宮。同夢老嫗。手持折枝白蓮與之。乃生覺蓮。生而俊慧。父母異之。三四歲。指字與識。以多自喜。其父母欲其繼家業。爲買至五歲。自請讀書。過目成誦。出語驚其師長。教之文藝詩詞。若素習者。共稱爲神童。其補諸生。中鄉試。未冠也。乾隆四年。成進士。選庶

吉士散館授編修數遷階父母皆受封以歿仕至詹事

安南縣龍翔山一名巍山在縣東北五里山頂有洞洞中有天成石碓石爐

安南縣東哈馬關南老雅關極險峻外有盤江以爲固興義有魯溝卡爲南面之遠隘眞天險之地而昔未有能守之者足見險不足恃

安南學舍傍有欲飛二大字在巨石上明總兵鄭子龍所書莫忙亭亦子龍建

庭間錄載吳逆在滇開科取士有中式某任雲南某州知州大堂署聯云皂隸排衙渾如一天星斗本州坐堂好似五帝朝天又顏其廡曰廡焚軒余往大定過鎮西衛城通衢有節婦坊新斲石爲之坊極高石柱大書深刻朱字聯云閱清冊數條憂憂乎人所難也披請題幾幅熙熙然衆皆悅之又於某城見武弁署其營門曰柳細風清

黔西州署西偏有海棠一株老幹偃蹇人言花時極香軒亭位置亦佳州牧會稽陶廷淑有聯云名友冠羣芳未知杜老當年何獨無情不詠紅香飄四座若使淵材到此亦應有恨俱消

安平道中過蘆荻哨數十家皆土娼其西五里有山象婦人坦腹下有竅東南有大石如人口口向之黔人用潮銀名吹絲炙以火則鉛出

借短票銀市商謂之銃

黔中婦女作背兜負兒於背每歲中秋夜以少年裝束如女子背瓜鼓吹送至親友牀上祝生子名曰送

瓜。

省中街市皆砌以石。雨後極滑。婦女雨行穿毛底襪。或用樓底。最穩且快。

市人釀銀錢爲會。每月籀之。團飲爲樂。曰上會。婦人亦多爲之。其始蓋皆各省流寓之民。鮮土著者。故釀銀寢以成俗。輕去其鄉。隨地遷異。上古淳質之世所不爲也。

豬肘呼曰胖。讀胖。上聲。煮爛曰色。讀怕。平聲。

酒一壺曰一棒。故呼酒壺曰棒棒。

夷人稱漢官曰大老黃。吏士曰小老黃。黔俗稱人皆曰公。老者曰老祖公。稱長隨曰二公。凡女皆曰婆。婦曰奶。曰太老者曰老奶。老太其尤老者。老祖太。間稱婦女。通曰老太。其大公、二公、三公、大婆、二婆、三婆。則依次爲稱。小者曰么。曰滿。至稱女爲妹。則賤之矣。父母於兒亦不名。皆曰大爺、二爺。以次呼。

男婦做客。俱取席果糕餌之類。包裹攜回曰紮包。

凡他省人客黔。娶妻生子。名轉窩子。轉窩所生。名門斗子。再傳則土人矣。轉讀去聲。江西人尤多。

凡妓所居。濫者曰塘子。潛藏者曰私門子。男女往來者曰做客。稱游妓亦曰客。俗稱最小者曰么婆。幼妓

爲小么。塘子多在阜角井三板橋。

省城東相寶山樓上有鏡。相傳能照前世。名照妖鏡。余於消夏時。過寺見之。昏昏不能辨人媼妍。其厚二寸許。兩面皆有光。又有銅牛在佛座下。缺一耳。亦古物。疑二者當合爲一。然後可用。俗人誤置二處耳。

黔靈相寶、棲霞、諸山並有吳達善、劉藻、二制軍詩。最佳。余欲錄歸。以行不果。

張蓮濤有五禽言。其辭一曰。昨日雲陰。今日雨零。昨日山暗。今日水深。水深猶可。泥滑滑。愁煞我。二曰。吁。可怖。山下路。齒齒者石。淫淫者霧。東西上下無着處。不如歸去。三曰。陂陀陂陀。左崖右阿。崎嶇逼仄。可奈何。行不得也。哥哥。四曰。山有草木。巢居樂。田有稻粱。啄不餓。得過且過。五曰。孔雀山雞。炫毛自禍。我藏其美。時至則可。吁。嗟。鳳凰不如我。

黔記卷二

包祚永字成美。號存齋。貴筑南上里陳家寨人。自幼穎異。力學能文。年十四補諸生。二十三登賢書。雍正五年成進士。改庶吉士。累官廣東道監察御史。性明愨。不慕浮華。切究民生利弊。有意經世之業。敦本務實。遇事敢言。乾隆初。楚鹽騰貴。官引不銷。大臣會議。祚永言。應照兩粵官運官銷。則私鹽可絕。而價自平。又言滇省銅廠收買。正餘銅宜以辨銅庫本餘息銀。酌量加其價值。以卹廠民。又言黔省苗狎。頗能自衣其力。而漢人惟資楚布。歲需千億萬費。兵民窮困。職此之由。請立法勸以紡織。並言八旗婦女多工刺繡。耗力而無益於用。亦宜學習機杼。以資生計。又言古州新入版圖。諸險要之地。建立城汛。安設屯軍。而竄伏未還之苗甚多。深山窮谷。畏罪逃刑。雖從前猖獗難容。其目下困窮可憫。多傷失所。咸切思歸。但聞田土已別經領種。村塢多改爲城堡。向隅轉壑。疑慮不前。誠恐異日潰散有虞。莫若此時招徠設法。近經督臣張廣泗議。凡已剿苗寨。所有投撫苗衆。酌其人口。撥給土田。歸并安插。應再加詳酌。務盡招出潛藏餘苗。分配各寨。漢三苗一俾。漢苗雜居。強弱相制。卽實無土可給。亦堪傭佃營生。撫恩束法。自可漸革曠凶。以厚藩蔽。並言滇省近開麗江、普洱、昭通、東川等府州縣。裸夷偪處。須調兵防。而地廣兵單。調多額少。督撫提鎮。以糧餽歲資協濟。而經費有定。勢難議添。竊思助兵之不足。莫如留心團練。素稱精悍。夙著勤勞。但團制若循舊而行。必事難而累民亦甚。惟有變通其法。略無紛擾妨農。不必設衛屯田。不必集衆操演。

諭以保固之要。免其奔應之繁。按州縣戶口多寡。每選壯健數百名。給予本省優免。註冊示勸。一逢地方有事。或令防守隘口。或令扞護城池。此不增餉添兵。可期內安外固。祇以向來團練。或統之武職。則遭官兵役使。弁員虐凌。或屬之文官。則又爲武職大員所脅制。謂當慎重其事。請於迤東迤西兩道。並加兵備。職銜以董率之。庶得文武和衷。遵奉惟謹。若遇調用出征。支糧賞卹。概與官兵一例。如此。則與戎政大有裨益。疏上。議如祚永言。七年二月。因前任貴州提學監察御史鄒一桂。條奏清丈黔省田畝。逐坵繪形編號。設由單以給業主。立官冊以杜訟端。其有丈出餘田。祇將原賦均攤。不必加增賦額。部議未上。祚永具疏爭之。其略曰。臣黔人也。備悉民俗。丈量一事。徒滋擾耳。他省且然。臣省尤甚。奏者之意。以爲黔田從無頃畝。不知歷來頃畝。未嘗不清。康熙元年五年八年。皆有開墾畝數。報官成賦。九年。經撫臣修鳳彩。請盡行清丈。定額升科。十一年。竣事。載入賦役全書。是黔省並無不丈之田。豈得如一桂所云。田地但計穀種。而無畝數之理。且謂丈量爲清訟。而舉攤賦不增。但無知愚民。易惑難曉。初聞清丈。已覺倉皇。繼見差官。尤生畏懼。彼窮鄉僻壤之間。保無有胥役乘機嚇詐。倡爲旣丈之後。實欲加賦之言。因而臨丈之時。高下任意。行賄者將多報少。缺賂者以少作多。遂致富室勢紳。勾稽弗確。貧民夷戶。積算偏精。弊竇叢生。田畝益混。兼有奸猾頭人。串通衙蠹。暗折夫馬。明索酒殺。冊結紙張。巧造名目。或照煙戶。或依田畝。逐需挨派。共飽私囊。再或農隙之時。小民趁營生務。故於旬日之前。追集合村多人。行其苛索。候丈無期。以致廢時失業。卽有能員覺察。日久敗露。而閭閻受累已深。若夫編坵繪形。發執由單之說。揆之黔省。更屬難行。夫

田界有定。坵形不常。黔民多貧。產業無幾。或有兄弟析居。將一坵分爲兩三。則由單不能各執。黔田多依山麓。故俗曰梯子田。或有夷高培低。合數坵而平爲一。則又與由單不符。其窮民典買。或有數坵一單。減半轉售。則由單又需分給。更換繳領。民則剝削貲財。官亦殫繁案牘。又其甚者。清丈田畝。則通省寸田尺土。俱當履隴親勘。而全黔上下游。沿邊地界。接連滇粵湖南。半屬生穰生苗。冥頑易駭。倍當拊循。遽加丈量。恐致滋事。在一桂謂立法務詳。意非不善。而臣竊認。認過慮。誠見黔省乃刀耕火耨之鄉。素稱瘠薄。苗蠻雜處。當思因地制宜。使果田無定畝。卽不緣民間爭訟。亦必徹底清查。若久料畝升科。又不得一二競爭。輒至累及通省。應令督撫將從前業經丈清。現在按則起科者。概免丈量。其有近年開墾。實在未丈之田。各令地方官查明轉報。以憑清丈。分別辦理。則黔省民苗。咸戴萬世矣。疏入。部議如祚永言。從之。尋以病乞歸。授徒里閭。主講貴山書院數年。勵諸生以純樸之學。家庭謹飭。操行如寒素。冬戴皮冠。舊矣。鞞見處。以青布綴之。牕紙破。補以卷牘廢餘。其節儉如此。年六十有八而卒。子必明。雍正十三年舉人。官武寧知縣。曾孫錦榮。乾隆五十四年。以郡籍。中鄉試第一名。錦燦。先其兄一年。亦以郡籍中式。嗣裔多守家學。入郡邑庠者。祚永卒後。所親官奉天歸。謂奉天有包御史祠。蓋祚永嘗因公辦事其地。吏民建以報功德云。

張仙。一字元元。俗名仲猷。號三丰。又號斗蓬。又呼邈邈仙。閩縣人。又云羊城人。廣州志云。留侯後裔。七歲能碁。人無敵者。十歲習儒業。有小婢饋魚於塾。爲同業者棄去。而仙不知。歸撻婢。婢縊。遂入山學道。遊歛

州。值歲旱。從者死。遇二老人。遺之餌。乃得活。乃入番家華林。三十年出山。渡流沙。禮邱長春。歸未至閩。途遇鄭思遠。授以道。鄭謂曰。一魚之事。子必往了俗緣也。歸閩。補刑曹吏。辟囚越獄。連坐戍夜郎。至平越。與千戶張信奕。信不勝。信忽夢老嫗授子法。乃勝。仙大笑曰。蠟山老嫗大饒舌。後授信葬地曰。十年後。位至封侯。既而果然。明史載三丰遼東懿州人。名全。又名君寶。又天順年。三丰有自具供狀。稱冀州遼陽人。遼冀相近。閩則遠矣。或寄居之地與。

明陸燦高真觀禮斗亭碑文曰。平越之地。因山爲城。有老氏之宮。曰高真觀。據其西南隅。在昔仙人張三丰。栖遯於斯。作亭以禮斗焉。先生既超離人羣。還居大清。元蹤日邈。遺構遂泯。惟先生之道。廣大神明。形骸外垢。天機內朗。若夫遐襟曠識。卓爾物表。雖萬乘傾想。躡景追聲。而隱見猶龍。終莫羈致。蓋軒后詘下風之從。廣成堅南首之臥。未足以喻也。當其寓形域中。此焉遊息。扳揖斗極。與相周旋。時則斯亭者。固靈輿之所降觀。百神之所萃集矣。而翦焉墜落。鞠爲茂草。令仙聖臨輓而歛歔。龍鶴迴翔而不下。元學之士。無以繫其戀慕。斯非吾徒之責與。燦雖僑寄是邦。心存高範。竚瞻廢址。慨然興壞。於是屬其觀之黃冠師馬崇霞。俾經理焉。而率諸同志者。助其費。數月亭成。道俗環矚。咸共歡喜。議鑄於亭。以示無極。迺稽首階前。勉爲之銘。其辭曰。嶮峨之山。形穹隆兮。虬螭結蟠。鳳臨江兮。扶輿宛延。靈淑鍾兮。言言元宮。直崇墉兮。亭宇密清。檄斗中兮。至人天遊。此從容兮。澄心儲精。與神通兮。清夜霽然。星輿降兮。魁旋杓回。玉衡度兮。遺墟寂寥。厥構仆兮。百年於茲。復其故兮。棟桴高驪。棼椽布兮。神居祕躅。燦然覩兮。鸞鳥騰告。列仙赴兮。

雲耕電旌。紛腹路兮。元冥在穀。黔羸右兮。飛廉望舒。後先俟兮。天樂博衍。客倚靡兮。盤旋遊遨。行遲遲兮。搗阿山靈。時守視兮。風雨攸除。無阨隄兮。惟仙日長。昊天久兮。刻銘斯亭。與終始兮。

平越守滿洲阿林詠。回生桂詩云。仙桂扶疏。挺石臺。孤根拔地。倚雲栽。金枝一樣。超凡劫。玉斧多應。恕散材。香滿秋空。長不老。寒生明月。靜成胎。返魂七寶。娑羅樹。太息三丰。爲汝來。禮斗亭云。五夜朝元。禹步停。默參元相。合心銘。觀空分野。星何在。度極周牌。數尙零。自有真人。歸紫府。更餘俗子。誦黃庭。黔黎百萬。皈依切。頂禮支天。一斗亭。浴仙池云。邈遐埋真。莫記年。不因離垢。不知仙。呼茶率爾。唾湯竈。濯足夷然。恥盜泉。到處傳流。風作影。幾人踏破。水中天。竭來措大。空饒舌。滌研何勞。白石邊。留影壁云。天外青山。山外人。虛空留相。不留神。東來故作。飛鳧幻。西去安知。脫屣真。橋上灑金。猶點石。水中撈月。已生塵。須彌絕頂。超然立。兩袖清風。萬里身。

去平越城西三里。山中斷石壁奇峭。有張三丰影象。戴笠杖策。測身西行狀。郭青螺題神留宇宙四大字於巖上。乾隆五十餘年時。忽有廝役某姓者。於留宇宙字下。斲石作魁字形狀。可憎。其時官民俱無止其事者。污壞靈巖。妄作不經。亦恨事也。

青柳池在高真觀前。無名氏有詩云。回廊婉轉水雲寒。柳絮吹飛春色殘。玉笛不聞黃鶴遠。何人同倚曲闌干。

黔靈山在貴陽城西北三里許。有一峯。蜿蜒從西北來。爲杖鉢峯。水潺潺繞山麓。爲檀山澗。水中峯矗立。

卽黔靈正峯山口有楊柳泉甚清冽。又進有天生石橋。翠竹掩映。過此則宏福寺也。寺北一小徑。可通樵牧。卽大羅木村。村前有溪。抱山後折而東轉。有岫參天。昂藏回首。乃獅子巖也。巖下有峒。洞下有溪。皆名檀山。自寶塔峯右。特起一嶺。自南而東。綿亘內向。與師子巖對峙。如雙闕者。象王嶺也。又其外。則師子山。昂伏爲案。上有雲蓋三臺。縹緲天際。登象王嶺。望貴陽城郭。歷歷如指掌。山後可眺聖泉。

宏福寺爲赤松和尚建。和尚名道領。浙江人。後遷長沙。又移蜀中。居潼川。姓韓。父中軒。母謝氏。和尚生而好佛。不茹葷飲酒。明末避亂至黔。爲杜氏。後棄儒業。投靈藥。和尚剃爲僧。遊滇蜀歸。遂闢黔靈山。爲祖師云。

古州同知毛振翹。秋日登黔靈山寺。留贈參之上人詩云。石磴紆回到上方。開軒風露撲衣涼。白雲冉冉藏僧閣。黃葉紛紛墜佛牀。身臥靈山觀自在。心馳碧落笑奔忙。蒲團坐話非容易。況復高僧是故鄉。說法臺前花雨迷。遠公一話夕陽西。題詩未敢誇遺社。送客還看過虎溪。清磬數聲空谷杳。紅塵十丈下方低。逃禪不覺歸來晚。滿徑松陰襯馬蹄。登拱南閣再題贈參上人云。雲樹蒼茫望渺然。凭欄秋思滿江天。孤松幹老多巢鶴。衰柳枝殘不挂煙。目送飛鴻懷往事。人臨逝水悵流年。桂花開盡黃花放。纔得偷閒一扣禪。芳杜洲前草色齊。萬山飛翠日沉西。觀風臺上蕭蕭葉。丞相祠邊喔喔雞。少女澣衣秋水碧。牧童收犢暮雲低。坐來詩思清如洗。短紙重張筆再題。

銅仁舉人楊光燾。登黔靈山。訪赤松師不值。詩云。歷盡巔峴路。危梯挂石闌。凌空人似鶴。望遠市如盤。雲

掩孤扉迴。風高六月寒。謾須尋勝跡。緩步已蹒跚。不圖霄漢外。蜃結涌珠宮。軒轟森高下。盤旋入宵濛。雨餘芳草綠。霞落碧厓紅。坐覺塵機息。悠然憶遠公。自來峯頂上。石逕總玲嫻。落落松千個。離離花滿庭。雲歸僧舍碧。煙竊佛頭青。想像天台路。奇觀殊未經。不盡看山興。遲遲日已斜。清香餘茗椀。佳味飽胡麻。院寂揉升木。庭空鳥啄花。主人歸路晚。明月照袈裟。

黔中多黃果樹。卽柑也。

田山蘊過平。越倒馬坡半。見隔山石壁。仙人影。儼然圖畫。作歌曰。神仙之說。果有無。幾見員嶠兼方壺。風蟬脫骨幻術耳。逃名欺世誇清都。劉安雞犬事頗怪。錢鏗年紀言多誣。漢武不識東方朔。祀竈卻老何其愚。人生百年五倫重。學仙信佛皆僉夫。草木瘴癘山水窟。其間或有煙霞徒。熊經鳥伸訣自祕。寸田尺宅理豈麤。地產丹砂大於斗。彭亨鼎大鉛汞腴。異哉三丰僮侶。邀遶道士羣。相呼洪武初。載來黔地。巖峨城市吹都盧。石鉢洗泉清且旨。廟砌老桂榮不枯。郭外層嵐立千仞。忽於巔頂傳形軀。勾展顧吳作小照。儼然一幅行仙圖。華陽笠子兩芒屨。手拖藤杖西方趨。飛瀑直衝入袍袖。松花下落黏髭鬚。憑虛御風將焉往。何不爲我停須臾。神留宇宙四大字。筆法倒薤非模糊。誰人結構置峭壁。巧匠斲削驚天吳。始信靈蹤非妄誕。徘徊不去坐日晡。長生思假六禽戲。前村微雨鳴鷓鴣。

平越城南三里。仙人影厓前。地名武勝關。有橋。每夜有微雨灑之。橋常溼。土人呼爲夜雨灑金橋。

犀牛洞。在平越城外。月山之北。高真觀南。內有石牛。明正德間。高真觀有鐘夜出。與牛鬪。如雷吼。早起視

之。鐘上皆水草。

平越西南五里許。有仙人洞。余自平越回省之日。冒雨往尋。在山半徑仄且滑。至洞則豁然開朗。如萬間大廈。其西畔別一門。曲且深。入其中。又一洞。然炬視之。其上若屋然。水點滴落石池中有聲。酌以烹茶。味甚甘。僧構木於巖間。爲小榭。下臨絕澗。水聲如萬馬奔騰。境殊奇絕。西畔又一門入。極暗。上出僅容一人。側身仰出。忽見明。則其上有一小圓穴。窺見千仞峭壁。下俯急湍。亦奇觀也。

遵義西門外山頗秀潤。渡河至山麓。爲桃源洞。其上有謫仙樓。相傳李太白流夜郎曾至此。郡守趙君遵律建樓。又以太白有白田聽鶯詩。而山下有村名白田。因以爲太白聽鶯處。謫仙者顧晴芬前輩。督學黔中時所命名也。今典史陳名丙者。天長人。亦能詩。著有什一集。復鳩衆於樓之左右。循山麓構軒亭十餘處。丹雘紅樹。重閣飛甍。掩映於翠微煙靄中。頗具勝概。

黔中丞尉中有三風雅人。一遵義縣典史陳丙。號吉甫。卽著什一詩者。一大定府經歷董達。號瑜薌。華亭人。文敏六世孫。善書畫。詩宗儲王。頗新雅。今署貴陽府經歷。一黃平州吏目李炤祿。字申之。號乙閣。江陵優貢生。亦能詩。事繼母至孝。搜輯飛雲洞詩文。爲一編。名靈巖小志。近又爲甕安生員傅玉書。刻黔風集。黔風者。傅生採錄黔中詩。合爲一編。其書未成。余未之見也。余試大定遵義時。董與陳爲巡捕官。皆勤敏。黃平則往來驛路所經。李申之來謁。恂恂讀書人。下僚中。豈無賢者。患不能知而用之耳。

董瑜薌。有和余贈沈蘋濱詩。其序云。嘉慶甲戌仲夏。芝齡學使。試士大定。逵承乏郡參軍。晨夕趨陪侍從。

雅蒙禮遇。秋半調貴陽。逢公內遷大司成。將治裝北行。奉獻一章。以證知己之感。不專贈行也。時公有贈蘋濱詩。卽用元韻云。夜郎地遠五溪水。唐有寓賢供奉李。越千餘年逢吾公。江東獨秀真才子。手持使節來一年。邊土文風蔚然起。鄙人幼學荒三冬。束髮畏見名儒宗。秋風十載傷毳毳。饑驅出門愁滿胸。南北奔馳寒復暑。名流許我披雲覩。儒生爲貧甘折腰。一官來聽漏天雨。羅甸城邊山瘴深。四月五月如秋陰。熟梅風裏輜軒到。窮巖大壑龍虎吟。耿耿文光燭霄顯。持衡力挽狂瀾倒。蠻府參軍趨下風。公之接余不草草。建康山色蔣侯祠。故鄉遊迹曾題詩。是時凡鳥奮雙翼。思與鳳凰頡頏之。公當快意達失意。華林未共神仙醉。荒陬相見隔雲泥。回首當年汗浹背。憐才彷彿信陵君。一月欣陪大雅羣。秋半會城重謁見。朝朝思近叢蘭芬。遶不負丞丞余負。卑官落拓誰爲友。黔山忽返使星輶。歌驪忍勸郵亭酒。瑜薌又示余過畢節威寧途中詩。七星關云。馬首南荒外。蛇盤石壁間。地周八蠻碛。天近七星山。蜀漢風雲氣。祠堂虎豹關。徘徊禡祭處。夕景照孱顏。當年濟濟火。卽此効前驅。龍臥留壇宇。雲高化陣岡。同槽三馬戀。諸葛百蠻呼。想見南征日。星文射魏都。三道水云鹽。井空騷馬。鉛山亦汗牛。如何三道水。不濟一行舟。野馬川云。兩地均烏撒。中分野馬川。湍流赴沙草。客路與洞沿。箐古時窺日。雲游易障天。行行三十里。何處有炊煙。七家灣云。枳籬竹瓦屋。三間迴合清淪倚。半山揸枕山牕。一夜雨。曉來水漫七家灣。七家門外一灣平。有客山行復水行。忽漫泥輜石上過。怪來一路只磴磴。瓦甸云。瓦甸原無漏。其如客路遙。聊停啜杯茗。莫悵雨瀟瀟。渾水塘云。借問水何渾。其端不在水。川澤能納污。澄之斯見底。石牛口云。回看野馬川。忽入石牛口。

前世龍門公。今生牛馬走。石板房云。尋山不知遠。活石化爲板。一板兩板縱復橫。重之百板魚鱗生。板板雲連瞰天庭。差少琉璃布地平。長文弗下拜。茂灌爭知愛。海嶽與華林。古情隔幾代。此邦石數恆。河沙不點黃金卽作家。多錢善賈長袖舞。聚族於斯館行旅。莫訝天無三日晴。古來幾費神媧補。杜鵑花云。野花零亂草蒙茸。幽豔從看血淚中。底事多情生鬼國。殘春猶染徧山紅。土人以杜鵑爲徧山紅。金絲桃路黃。一名過。云。苦蕾初生瘴雨寒。未花蹊畔已無言。春來斗覺黔山富。拋擲黃金過路看。桐花云。簇簇桐花受露濃。最嫌掠蕊是胡蜂。寄聲五色桐花鳳。莫惜西川萬里蹤。大定往蜀道。余未之見也。都錄其詩。以備考證。

因錄鄴芸。瑜薌。和余贈蘋濱詩。並錄蘋濱和章。平生奇癖耽山水。萬里牂牁行李。整牙蠻語詩一囊。逢人敢自誇才子。李徵君文飛將軍。角逐難言翦與起。謂鄴芸。輜軒隣隣來前冬。隴西鉅儒風雅宗。如圭之品

如椽筆。光芒衆宿羅心胸。玉尺衡文歷寒暑。株穢刪除蘭芷覩。入幕者誰乃徵君。公之今雨吾舊雨。古槐夾道試院深。樗材難傍桃李陰。故人袖詩作羔雁。之黔留黔長短吟。風雨連朝送西顛。旅館閉門傷潦倒。蕭蕭鬢白布袍青。遠志在山亦小草。浮玉橋通丞相祠。一過再過嬾賦詩。入秋後曾兩過城南丞相祠堂。別有好山入夢寐。足未着履心先之。貽我一篇慰我意。公瑾醇醪令人醉。先標詩品後招游。字字麻姑爬癢背。買絲欲繡平原君。折節下交今無羣。國士之感從隗始。夜郎衆口揚清芬。登臨有約肯相負。公是名師徵君友。黔山權當子雲亭。從遊願載侯芭酒。

遵義蠶事最勤。其絲行楚蜀閩滇諸省。村落多種柘樹。繭客至春時。買其樹放蠶於上。繭成來收取之。廣

東程鄉。繭亦遵義絲也。居民無男婦大小。手中皆持一撚絲墜子。余莅郡時。見執事役。伺應之暇。就懷中取木墜子。撚絲不輟。可云勤矣。

遵義、貴陽。以烏江爲界。烏江之西。山色秀潤。樹木蔥籠。過江則皆童阜。多臃腫狀。一水之隔。而風景迥殊。烏江上名大王坡。其假借極可笑。又有黑神廟。余有聯云。省曰黔省。江曰烏江。神曰黑神。緣何地盡南天。却占了北方正色。無能對之者。

鎮遠溝水。流爲沅江。諸山谿水多會之。東北二十餘里。有一溪。名潮水溪。其水獨濁。相傳發源處。有伏犀焉。

牟珠洞。在貴定縣西十五里。大道傍。洞口爲石門。上有古松一株。門內有觀音蓮座。石乳所凝也。其上圓洞。透天光。再入。則必攜炬火。有石鐘石鼓。亦鍾乳垂結。輪囷如象鼻。擊之。其聲類金革也。又有羅漢像。在巖下。如僧寺所塑尊者。其他石佛石魚。因形似而命名者。不可悉記。又有千頃田。則平地似方罫。石骨隆起。如陌阡然。傳聞此洞。可通人行百餘里。詢諸寺僧。則云中有水。不可行矣。

華嚴洞。在施秉東北二十五里。洞口懸厓。刻西時飛來四大字。洞中亦有羅漢像。燃炬入。上如屋。水點滴。四散滑。不可行。其通人處。亦可二十餘里。遊者罕能窮其境耳。

遵義縣署。有方池。池水綠色。其旁石穴中有巨蚌。時或見之。府署有綠蛙。長二尺。大如斗。安順參將署後。有井。其水煮飯。白米皆成紅色。如晚稻。

威寧州有泉從地出。整石爲池。其泉自泥沙中湧出。如貫珠。池中凡十數處。終日沸起。俗呼爲葡萄泉。飛雲洞有宋芷灣湘題詩。有句云。一般九月秋黃葉。兩度三年人白頭。蓋芷灣會典試黔中。復以京察出爲雲南守。故言之慨然。樊城旅店。又見其題壁五詩。悲歌慷慨。經南陽荒敝後。不覺聲淚俱下矣。詩曰。十日河南路。年荒不忍看。青苗收稿易。黃土葬人難。苗或抽條而稿或抱穗而稿皆刈作芻秣道殣不絕可傷不雨自何日。有田同一歎。草根能幾許。過客亦登盤。三十萬糧賑。饑民殊未知。君恩如此厚。漕運到何遲。盡室驅兒女。隨風轉路歧。馬頭南北望。無過是流移。亦知死不遠。且自望生逃。道路無人哭。春犁有夢操。乞錢憑婦見。得餅止兒號。恨少神仙術。多金散汝曹。昨過古昆陽。連村夜劫糧。平時春社肉。今日虎牙羊。舊縣地方三日內搶人村莊矣此輩原拚盡。爲官何策長。率領時邑宰方出。天河無限水。安得化成漿。保富談何易。原貧法亦難。古來惟積貯。大地不波瀾。帝德同天大。民流歎海寬。監門圖一幅。誰奏九重看。時癸酉七月十六日也。兩閱月。遂有滑縣之事。旅行見此。能無愴然。

黔記卷二

裸羅。本盧鹿。在大定府屬。有黑白二種。黑者爲大姓。其人深目長身。黑面鈎鼻。雍髀留髻。其俗尙鬼。又名黑鬼。造堅甲利刃。鏢鎗勁弩。蓄良馬。好射習擊刺。其兵爲諸蠻魁。

羅鬼女官。卽裸羅正妻。稱曰耐德。編髮爲髻。用青帕蒙之。多以銀絲花貼額。耳垂大環。拖長裙三十六幅。子年幼。不能主事。卽耐德爲女官。代理所部。

白裸羅。在大定、安順、二屬。

宋家苗。在貴陽安順二屬。男耕女織。今多讀書入泮者。

蔡家苗。在貴筑、修文、清鎮、威寧、平遠等州縣。俗翁媳不通言。居喪三日。不食稻肉。惟餽稗粥。夫死以婦殉葬。婦家奪去。乃免。

卡九狝家。在貴陽、安順、興義、平越、都勻等府。穿青布短衣。婦女以花帕蒙首。衣短而下圓。嚴寒盛暑。衣無添換。長裙細摺。勾雲合角。中以顏色相間。以六月六日爲大節。每歲孟春。聚會未婚男女於野外。跳月歌舞。彩帶結毬。拋而接之。謂之花毬。意旣洽。彼此互擲。遂私焉。凡祭祀。貧者用牛一。富者數牛。親戚族友。各攜鷄酒致祭。遶牛而哭。祭畢。屠牛分肉。食畢而散。

篋籠狝家。一作普籠。又作補籠。在貴陽、定番、廣順、二州、安順、興義、二府。以十二月朔爲大節。相傳武侯南

征時。所遺銅鼓。若掘地得之。擊以爲歡。富者常以重價爭購。喪則屠牛。招戚友。以牛角歡飲。孝子不食肉。惟啖魚蝦。故祭亦必用之。葬者以傘蓋墓。期年後始焚之。其性慄悍。出入必帶利刃。倘有睚眦之仇。必報。近今禁戒。漸循禮法矣。

青狝家。在古州、清江、丹江等處。以青布蒙首。穿青衣。女子色白而敏。工織繡。善奕棋。以擲毬爲樂。所私者。曰馬郎。夜則與之飲。父母知而不禁。惟避其兄弟。婚姻苟合。愛者以牛酒致聘。不知正朔文字。以木刻爲信。田山蘊黔書。但載狝家。未分卡九、篋籠、青三種也。

會竹黔書作會竹龍家黔書云龍家有四。在康佐會竹者爲狗耳。在安順府屬。婦女穿白衣。繫桶裙。戴細布方巾。以髦札一尾。名曰髦尾。用豬油塗之。遇親戚喜慶。則負酒牽羊。并隨帶新衣數襲。以誇其富。死則殮煨骨而葬。每七月七日。祭奠先塋。

狗耳龍家。在安順、大定、二府及廣順州之康佐司。有之。男子以布蒙首。婦人辮髮。以布束結於頂。餘布旁結兩指。如狗耳狀。黔書云。男女旋躍而擇對。奔則女氏之黨。以牛馬贖之者。今亦知通媒致聘矣。

馬蹬龍家黔書云一日大頭龍家。在鎮寧之谷西堡。頂營司之間。以耕種爲業。

大頭龍家。鎮寧、普定。有之。男子戴竹笠。婦人衣土色衣。繫青短裙。斂馬鬣於髮。髻如蓋。男女勤耕作。花苗在貴陽、大定、安順、遵義屬。皆無姓氏。其性慙而畏法。其俗陋而力勤。衣用敗布。緝條織成。青白相間。無領袖。黔書載其跳月事最詳。今亦知用媒妁。惟婚娶。必男至女家成親。越宿而歸。仍舊俗云。

紅苗。在銅仁府屬。

白苗。在龍里、貴定、黔西等屬。衣白衣。男子蓬頭赤足。婦女盤髻長簪。祀祖之先。必擇一肥壯牯牛。頭角正者飼之。乃聚闔寨之牛鬥於野。勝則吉。卽卜祭期屠之。主祭者白衣青套。細長裙。祭畢。合親族歌飲爲歡。青苗。在黔西、鎮寧及修文、貴筑等處。黔書稱其強悍好鬪。今則馴良。在平遠者。又名箐苗。

黑苗。在都勻、八寨、丹江、鎮遠、黎平、清江、古州等處。族類甚衆。習俗各殊。衣皆尙黑。男女俱跣足。陟岡巒。披荆棘。其捷如猿。性悍好鬪。頭插白翎。出入必攜鏢鎗弩環刀。自雍正十三年剿後。凶性已斂。孟春各寨擇地爲場。跳月。不拘老幼。以竹爲笙。人死。則生前所私者。以色線繫竹竿。插於墳前。男女拜祭。剪髮狔狔。在貴定、施秉、黃平、州屬。

東苗。在貴筑、修文、龍里、清鎮及廣順各屬。有族無姓。婦人衣花衣。無袖。惟兩幅遮前後。穿細摺短裙。男子蓄頂髮。短衣背褶。中秋合寨迎鬼師。以祭祖。及族屬故者。屠牛陳饌。以次呼鬼名。祭畢。集親族暢飲。竟夜。每春獵於山。所獲禽鳥。必薦其祖先。守法畏官。循禮服役。

西苗。有馬謝何羅雷等姓。在貴陽、平越、二府。新娶。必別寢私通。孕產後。乃同室。秋收時。卽合衆牛於野。延善歌祝者。披大寬氈衣。腰間周圍細摺。戴氈帽。著皮鞋。尊者在。前。童男女。著青衣彩帶。百人歌舞。吹笙隨之。歷三晝夜。屠牛以賽豐年。名曰祭白虎。性情樸實。畏法不訟。

天苗。在平越。多姬姓。性情柔順。婦人工織善染。以仲冬朔日爲節。其在陳蒙爛土壩者。俗詳黔書。按平越

草志云。天苗。周之後裔。志作以冬至日爲年節。

獠苗。在貞豐、羅斛、册亨等處。原隸廣西。雍正五年。改轄黔省。勤耕力作。薙髮服飾。俱如漢人。惟婦人蒙髮。短衣長裙。仍苗裝也。

打牙狃狃。在黔西、平越、清鎮屬。髮梳前披。取齊眉之意。

豬屎狃狃。在石阡、黎平、古州、平遠、清平各屬。極臭穢。出入佩刀弩。有讐必報。若獨力不能行。則備牛酒。以款有力者。鬪死。則納牛償之。

紅狃狃。在廣順、平遠、清平等處。

花狃狃。又名狃兜苗。在施秉、龍泉及黃平等處。男子懶耕作。好獵。逐鹿羅雀爲事。婦女兩袖綉五彩。周身飾以蠶繭。纍纍如貫珠。

水狃狃。亦名狃兜苗。在施秉、餘慶等屬。善捕魚。隆冬猶入深淵。不畏冷。男子衣服同漢人。婦人細摺長裙。婚姻喪祭。俱循漢禮。知法畏官。

鍋圈狃狃。在平遠州。男子自織斜紋布爲衣。婦人青帕籠髮。名爲鍋圈衣。青衣短裙。男子有病不服藥。用虎骨一具。上纏五色絲線。置簸箕內。延鬼師禱之。性好酒。惰於農事。

土人各處有之。性好鬪。今亦漸淳。

披袍狃狃。在黃平州。男女衣外披一袍。前短後長。鑿竅爲桶裙。羊毛織成。性純謹。勤耕作。多備鐵工者。又

或以種梨爲生。

牀猪苗有王、黎、金、文等姓。散居各府縣。冬則掘地爲鑪。臥牛羊皮席。無衾褥。遇時節。以草扎龍船。上插五色紙旗。於郊外歌舞。祭鬼爲歡。在清平都勻者。衣服與漢人同。親死。用長子居喪。七七之內。不沐浴。不踰戶。如長子貧。或以長孫次子代之。遵師教。多有入泮者。

犵獠苗在荔波縣。男子善耕作。婦人工紡織。短衣短裙。僅以遮膝。親死不棺。反歌唱。鑲木板。殮而停之。及葬。子女哭必出血。守墳三日而還。

僂人在普安廳各營司。性淳。佞佛。凡獮羅狝家等苗。言語不相諳者。常賴僂人通之。

蠻人在新添、丹江二處。男子披草篲。婦人青衣。花布短裙。喪葬殺牛歌舞。性獷悍。愛漁獵。以十月晦日爲大節。祭鬼。黔書作朔日在思南府之沿河司者。俗亦同。

洞人皆在下游。而洪州尤衆。性多猜忌。夫婦出入必偶。冬採蘆花禦寒。

獠人黔舊無之。雍正時。自廣西遷來清平、貴定、獨山等處。居無定址。喜傍溪澗。以樹皮爲連筒。灌水至家。懶於汲也。耕作之暇。入山採藥。沿寨行醫。所祀之神。名曰槃發。所藏之書。名曰勞甄。圓印篆文。義不可解。且珍祕之。風俗謹厚。見遺不拾。

楊保苗在遵義、龍里二屬。性多狡獪。抗官司差拘。而遵鄉老約束。

狜獠苗在都勻、黎平、石阡及施秉、龍里、餘慶、龍泉等處。有楊、張、石、歐等姓。

九股苗在興隆凱里黑苗類也。此種武侯征滅之。僅留九人。故名。地廣族繁。散處蔓延。性多悍。頭戴鐵盔。前有護面。後無遮肩。身披鐵甲。及臍下。鐵鍊圍身。鐵皮纏腿。左手持木牌。右手持鐵鏢。口銜利刃。行走如飛。三人共弩。名曰偏架。自雍正十年撫剿。搜繳甲兵。建城安汛。至今風稍戢矣。

八番苗在定番州。其俗勤。男日出而耕。女日入而織。穫稻則剝木臨流作臼。水自推而舂之。以十月晦日爲大節。黔書作十月望日爲歲首。親死。夜靜出葬。曰不使吾親知之。

紫薑苗在黃平、清平、丹江等處。與獨山州之九名九姓苗同類。輕生好鬥。遇讐者。輒生啖其肉。有在平越州者。多出入伍。大力善戰。及讀書應試。見之多不識爲苗者。

谷蘭苗在定番州屬。男耕女織。所織布最精細。諺云。欲作汗衫褲。須得谷蘭布。婚姻用媒妁。

陽洞羅漢苗在黎平府屬。男子耕作貿易。女人鬢髮散縮。插木梳於額上。富者以金銀作連環耳墜。長裙短褲。或有裙無褲。好潔。身常洗髮沃。苗類之最近人情者。

克孟牯羊苗在廣順州之金筑司。耕作不用牛。用鐵鑄代犂。耨而不芸。男女躡笙而偶。生子免懷後。始歸財禮。親死不哭。反笑舞浩歌。謂之鬪屍。次年聞杜鵑聲。則舉家哀哭。曰鳥猶時至。親不復來。

洞苗在天柱、錦屏二屬。擇平坦近水地居之。種棉花爲業。男子衣與漢人同。多衣漢人傭工。女人帶藍布角巾。穿花邊衣裙。所織洞帕頗精。通漢語。聽約束。

箐苗居山箐。在平遠州屬。種山糧爲食。男女衣服均自織。

鈴家苗在荔波縣。十月晦日祭鬼爲節。男女均以藍花帕蒙首。未婚者其帕稍長。每仲冬男女相聚歌舞。所歡者約而奔之。及生子後方歸母家。名曰回親。始用媒妁通聘。

獠家苗在荔波縣。衣長不過膝。每歲首雜魚肉酒飯聚盤瓢。擇居近水。善種棉。女自紡織。男子雖通漢語。不識文字。以木刻爲信。

水家苗在荔波縣。自雍正十年由廣西撥隸黔之都勻府屬。男子好漁獵。婦人勤紡織。有水家布之名。桶裙短衣。四圍俱以花布綴之。每歲首男女成羣。連袂歌舞。相歡者遂爲婚姻。

六額子在定威寧二屬。有黑白二種。結尖頂髻。婦女長衣無裙。親死時殮之。葬亦用棺。歲暮卜之吉。則延親族至墓前。以牲酒致祭。發墓開棺。取枯骨刷洗。以白爲度。用布裹骨復埋。過一二年仍取骨而洗之。七次爲止。遇家人有病。則曰祖先之骨不潔。仍取骨再洗。所謂洗骨苗是也。近今禁戒漸止。

白額子在貞豐羅斛二屬。男子梳尖頂髻。如螺。女長衣無裙。其俗與六額子同。但祝鬼而不洗骨。冉家蠻在思南府之沿河司。好漁獵。俗與蠻人同。

九名九姓苗在獨山州屬。性狡而悍。每多假捏名姓。喪葬婚事。殺牛聚飲。醉必相鬪。輒及干戈。受傷者納牛以講和。婦女以種山爲業。俗與紫薑苗同。

爺頭苗在古州下游。亦多有之。與洞崽同類。皆黑苗也。性喜戰好鬪。耕以鐵犁。人力爲之。不用牛。每歲冬月朔日爲大節。婦人習俗。編髮爲髻。近多銀系扇樣冠。用琵琶。長簪綰之。耳墜雙環。項圈數圍。衣短衣。以

五色錦鑲邊姑之女。必適舅之子。聘禮不能措。則取償於子孫。倘外氏無相當子孫。抑或無子。姑有女。必重賂於舅。謂之外甥錢。其女方許別配。若無錢賄賂於舅者。終身不敢嫁也。

洞窟苗。在古州。先代以同羣同類。分爲二寨。居大寨爲爺頭。小寨爲洞窟。洞窟每聽爺頭使喚。婚姻各分寨類。若小寨私與大寨結婚。謂之犯上。各大寨知之。則聚黨類。盡奪其產。或傷命。其俗善舟楫。

八寨黑苗。在都勻府屬。性獷悍。女子以色布鑲衣。胸前錦繡一方。護之。謂之遮肚。各寨野外。均造一房。名曰馬郎房。未婚之女。晚來相聚。其所歡悅者。以牛酒致聘。出嫁三日。卽歸母家。或一年半載。外氏向壻索頭錢。倘壻無力措辦。則將女改適。有壻女皆死者。向其子索之。名曰鬼頭錢。

清江黑苗。男子以布束髮。頂帶銀圈。大環耳墜。着寬褲。男女皆跣足。種樹木。與漢人通商。往來稱曰同年。愛着戲箱錦袍。漢人多買舊袍賣與之。以獲倍利。未婚男子。稱曰羅漢。女子曰老倍。春日晴和。攜酒食於高岡。男歌女和。相悅者。以牛角盛酒歡飲。奔而苟合。男子生子後。乃曰有後人。方事耕作也。

樓居黑苗。在八寨丹江。男子耕種。性剛而憨。婦人以羊角綰髻。愛居高樓。人死殮而停之。爲期合寨共卜吉。以百棺同葬。公建祖祠。曰鬼堂。其地什物。毫不敢犯。犯之以爲不祥。性最信鬼。愛養牲畜。人居樓上。畜養樓下。

黑山苗。在台拱、古州、清江三屬。以藍市束髮。居深山窮谷。不事耕作。每以擄劫致富。能卜茅草卦。預知吉凶。今安戢矣。

黑生苗在清江屬。性凶惡。訪富戶所居。則鈎連惡黨。明火執杖。劫而奪之。自雍正十三年。改漢人服。今亦守法。

高坡苗。在平遠黔西等處。着黑衣。喜種山林。婦女以木板尺許。綰髮內。故又名頂板苗。婚姻苟合。男婦善染力耕作。勤紡織。

平伐苗。在貴定之新添營。

黑狽家。在清江屬。廣植樹木爲業。其寨多富。與漢人往來熟識。可央隣近富戶作保。出樹木爲本。合夥生理。或借貸經商。無不應付。倘不能償。不妨直告其故。卽致虧折。可再添借。倘被人掣騙。又不能出外追討。則訪原保祖墳。掘取骸骨而去。謂之捉白放黑。又謂扯白罵黑。使原保之子孫。拘查掣騙之人。追借項贖取骨骸。所有隣近墳墓。常受其害。今設以保甲。此風息矣。

清江狽家。台拱有之。婦人耕勤。男子頭纏紅布。腰佩大刀。聚黨出寨。捉拏過路孤客。將長木爲枷。枷進寨內。索取財物。名曰贖身錢。如不給者。終不能脫。多受害者。近今嚴懲。畏法者。不敢爲也。

里民子。在貴陽黔西大定清鎮等處。男子多貿易。婦女穿細耳草鞵。勤儉耕作。閒時則紡毛布作衣。愛養牲畜。常帶入山作活。每歲節。與漢人同。

白兒子。在威寧及滇省有之。各有宗族。男子多漢人風。女人猶苗俗。漢人多贅苗女爲家。生子後。仍歸漢者。故名白兒子也。

白龍家在大定平遠二處。衣白衣。入山採漆。售於市。凡物皆背負。婚喪頗循漢禮。

白狝家在荔波縣。男子頭戴狐尾。以耕種爲業。女子身小而多慧。穿淡藍色衣。細摺勾雲裙。紅綉花鞵。脛帶銀圈。五色布褲。每孟春擇平壩。豎大木一空。其中名曰巴槽。男子各執竹片擊巴槽。其聲響似鼓。名曰打甌。又曰同耍。凡同耍。男女抱腰相戲。父母在旁觀之。以爲樂。有漢人通苗語者。亦與焉。未婚苗女。故多與漢人往來。名曰外郎。俟女正配有夫。耐以苗布一二疋。謂曰斷郎禮。卽不得再往。

土狃狃在威寧州。男子披草爲衣。專與獐羅雇工。每日用油燒熱搽足。故入山如猿猴。

鴉雀苗在貴陽屬。女子以白布鑲胸袖裙邊。最喜居山。種糧爲食。親死擇高山爲佳壤。其言語似雀聲。故名鴉雀苗也。有事時。在官惟聽鄉老之言。

葫蘆苗在定番羅斛二處。性凶暴。連羣聚黨。專以搶劫爲業。不事耕作。今以法嚴。亦守分矣。

洪州苗在黎平。男子與漢人同。勤耕力作。女子善紡織。棉葛布頗精細。多售於市。故有洪州葛布之名。

西溪苗在天柱縣屬。女子短裙不過膝。以青布纏腰。未婚男女。攜饅相聚而戲。愛者約於野。歌舞苟合。生子後。以牛過聘焉。

車寨苗在古州。男多藝業。女工針指。未婚者。於曠野爲月場。男絃女歌。聲最清美。與諸苗不同。相悅者。自

爲配合。亦名跳月。此種乃馬三寶之兵。敗落六百名。聚此贅苗家。故有六百戶之稱。

生苗在台拱凱里黃平施秉等處。多野性。所食喜生物。卽魚肉。亦以微熟爲鮮美。故名。

黑脚苗在清江台拱地方。男子短衣大褲。頭插白翎。出入三五成羣。持鏢帶刀。以搶劫爲能。凡作事以二螺螄置盆中。觀其相鬪。以卜吉凶。每多應驗。呼曰軍師。婦人夫死。不能再嫁。如男不行搶劫者。有女則不嫁之。今亦知畏法矣。

黑樓苗在古州清江八寨等屬。隣近諸寨。共於高坦處造一樓。高數層。名聚堂。用一木竿。長數丈。空其中。以懸於頂。名長鼓。凡有不平之事。卽登樓擊之。各寨相聞。俱帶長鏢利刃。齊至樓下。聽寨長判之。有事之家。備牛待之。如無事而擊鼓。及有事擊鼓不到者。罰牛一隻。以充公用。

短裙苗在都勻八寨。男子短衣寬褲。婦人衣短。無衿袖。前不護肚。後不遮腰。不穿褲。其裙長只五寸許。極厚而細摺。聊以蔽羞。採紫草以營生。性嗜酒。醉則常臥山凹。隆冬浴於溪澗。且云可以助暖。

尖頂苗在貴陽府屬。男女梳尖頂髻。每仲冬朔日。爲大節。夫婦耦耕力作。

郎慈苗在威寧州屬。其俗更異。婦人產子。必夫守房。不踰門戶。彌月乃出。產婦則出入耕作。措飲食以供夫。乳兒外。日無暇刻。父母將死。俟氣初絕時。將首扭向背後。謂曰好看後人。今則此俗漸改矣。

羅漢苗在八寨丹江。男子戴狐尾。披髮於後。最敬彌勒佛。每三月三日。男女攜食物供佛。歌舞三日。不食煙火。似有寒食禁火之意。

六洞夷人在黎平府屬。短衣色裙。細花尖鞋。未婚男女。翦衣換帶爲憑。卜吉嫁之。隣近女子。執藍布傘往送。名曰送親。連袂歌舞。至男家飲唱三晝夜。攜新婦同歸母家。新郎每夜潛入婦家。與婦同宿。及生子後。

方過聘而歸夫家。母家以苗布數疋爲嫁資。女則紡織勤勞。男亦多讀書識字者。喪葬禮悉與漢同。

八十二種苗圖并說。原任八寨理苗同知陳浩所作。聞有板刻存藩署。今無存矣。田山蘊黔書。舊有三十種。茲圖說較山蘊爲詳。惜其言不雅馴。擬暇時再爲潤飾成文。凡山蘊書所已詳者。俱紀其名。語不具錄。

苗婦畜蠶者。多得財。蠶多必須嫁之。或月一嫁焉。不知者往往於山僻小徑。拾得金錢衣包之類。取之歸。而蠶亦隨至。至家則朝夕供奉。稍不厭其欲。必爲害。甚有破家亡身者。秋間苗婦攜布袋買刺梨。與小兒食。多中蠶者。久爲羣兒識破。賣時先呼而問曰。中有蠶否。答曰無。則不爲害矣。狝家子畜者尤多。

黔俗家有病者。婦人以米置鷄子於上。蹲門而禳之。名曰叫魂。不愈則召端公祈禱。端公亦道士類。作法與演劇相似。衣服亦號行頭。且有選少年作女裝爲神仙者。觀者若狂。殆亦巫覡之遺風歟。

黔人婚娶。新婦至卽拜堂。新郎卽往謝妻父母。三日新婦母來看視。滿月回門。夫婦同在外家宿。

余自黔回京。壬戌同年涇縣朱蘭坡學士瑋所記黔中志乘草藁。題以長篇。且送余視學浙中。閱二十年。蘭坡掌教吳門。以所刻小萬卷齋詩集郵示余。重見是詩。不第作今昔之感。其詩亦足爲黔生色也。錄於

記中者。非以題茲記重也。爲黔故錄之也。詩云。太史陳詩古有訓。觀風往往往。輜軒乘。隨時載筆博尋訪。留

傳後代爲明徵。牂牁舊域極荒遠。欲據簡籍嗟難憑。蒙齋先生近持節。原註。田侍郎。委著錄。乃以黔書稱。細及禽

魚鉅疆里。羈縻藉可擊長繩。其中閱歷各殊異。豈尠聞見堪加增。星槎到處易攜取。淮陰學士當年曾。無多卷帙辭創獲。試校志乘非因仍。苗獍種列八十二。像繪較若分淄澠。圖功救安念尤篤。守吏莫漫荊舒

德馴安故俗迹。使易何妨尺土皆。峻嶒駢駢六郡卽蒙。

召惜未歷遍微盧丞。茲册收藏亦珍物。補苴且俟他人承。平生撰述不擇地。朗抱又鑑漸江徵。從昔越中號才藪。借資領袖君其勝。搜文考獻尙關意。譬彼鯁鯁胥歸晉。羣雅左右供驅使。條看竹素盈行滕。陳編媿我久跽伏。斥鷃那敢追搏鵬。聲名官職奚所羨。合任下上如風鏡。顧惟孤懷獨傾注。山水嗜已成癡癡。快君此去清賞得。隄近白傅臺嚴陵。偏於倥傯覓閒暇。策杖猶砍天臺藤。竭來摺採宜倍富。吉金樂石拳拳膺。鴻蹤卻憶灑陽岸。竟等晉楚卑邾滕。車筮宿盟幸勿忘。寄郵先付鈔胥膾。一篇跋尾兼敍別。長勺再鼓吾差能。

蘭坡又題余所繪黔苗圖詩曰。洞庭彭蠡間。古苗多根蟠。三危旣丕敍。地合隣泚桓。胡爲逮後世。窟穴仍叢攢。當由竄其君。郝戶原未殫。久之遂滋衍。宅田粗能完。牂牁種逾繁。散若星羅盤。遺兵六百人。乃以他族攔。漸成鬼方俗。荒陋侔貙豸。正朔尠率遵。蠢彼猴而冠。跣足躡芒屨。趨捷升巔岼。於中別生熟。畢竟榛殊蘭。大都寡恩情。親死昧置棺。舉尸焚諸野。歌唱相追歡。枯蛻卽埋瘞。恆出除垢癥。祭豐亦椎牛。屠肉供饗餐。迨夫葬子女。鷓血偏汎瀾。豈誠天真漓。顛越吁可歎。馬郎事尤醜。絲革私聯繫。跳月樂吹笙。誰克懲姪奸。惟宋家蓂家。聊作翹楚看。居喪飯稗粥。泮水榮袍襪。餘者頗力耕。倉廩新禾穰。谷蘭織質布。青舂繡齊紈。始知同食息。拊循良非難。斤斧毋遽持。輕擊脾與讒。衣衾但防患。庶免踰宜繹。前明神熹時。構禍開楊龍安。邦。炳熄幾何年。果否忱輸丹。

昭代極光被。西域邊疆寬。況此猶腹內。奠定應如磐。乾隆歲旃蒙。安爾羣揭竿。吾宗有英傑。謂慶公入陣披忠肝。鴉西寨殞身。迄今垂悲酸。

廟謨靖紛淆。崩角皆壺箚。將永弭厥燬。勗哉親民官。柔惠宜使懷。井廛勿凋殘。德威宜使畏。文網勿扞干。守土嚴且靜。澤浹心終寒。熙熙春臺登。那致湯沸涓。慕思似蜀相。銅鼓聲留謹。君昔駕軺車。若曹曾負蘭。採風徧蠻鄉。囊筆隨吟鞍。魑形並詭習。一一歸雕剜。譬益緝山經。目睹無夸謾。動念關

國計。飛鴉變翔鸞。盍當職貢圖。拜手呈

泥丸。朝端他日著勳業。名足參范韓。繫余苦株待。幸獲從旁觀。繙筴重推詳。塗蘂痕初乾。奮焉壯志起。遐壤封

黔記卷四

順治十五年孫可望李定國治兵相攻可望降吳三桂自四川進兵貴州四月克遵義五月入貴州糧乏兵疲還軍熄烽熄烽巨省百三十里屬修文縣與開州倒流水相去甚近敗總兵梁亦英於開州倒流水六月水西今黔西州宣慰司安坤蘭州宣慰司奢保受降七月還遵義定國部將白文選以三桂退保重慶遂自七星關進營生界窺遵義十月大兵分三路既集戒期入滇定國以西路已有白文選乃令初三昇出中路壁雞公背而出東路扼黃草壩十一月三桂還遵義進兵白文選退保七星關十二月三桂敗文選兵關地險峻前臨麻哈江兩岸石壁陡峭僅一小木橋可度其南岸石城木柵遍排巨礮積糧以守三桂知其險不可攻乃由水西至西溪河得捷徑至以烈凌晨渡關下流之天生橋抄出文選背文選兵驚潰至烏撒今威寧州可渡河入滇之道定國將馬寶後降三桂守可渡河文選敗走寶與俱奔時定國軍盤江永寧州地江水流入廣西毗連江城泗城土官岑繼祿導大兵入定國回軍拒戰敗績十六年三桂入滇康熙三年水西土酋安坤謀反初坤既歸命有常金印者自云開平王後自粵至與坤謀不軌又有劉永寧倪生龍丁調鼎李化龍等至阿堵牛場言海上已立新君國號平順晉王李定國尙在諭令起兵坤遂聚衆數萬以升如鼎爲總統通貴州土司羅大順等約共取雲南坤師張默之妻父皮熊熊本江西羅聯芳也爵匡國公爲孫可望所敗遂祝髮水西可卜河亦使蜀人陳進才等各路給散劄付總兵沈應時獲進才以報三桂督雲貴兵分兩路進討三月自率滇師由畢節七星關取道米羅歸宗直入果勇

令總兵劉之復駐兵大方。遏其衝逸。檄貴州提督李本深統貴州四鎮兵。由大方之六歸河會剿。屯糧三岔河。期首尾夾攻。而檄文誤書六歸。爲陸廣。於是本深駐兵陸廣。黔蜀所調糧儲亦盡屯於陸廣。鎮西以致兩路聲援皆隔絕不通。三桂軍於龍場見糧將絕。外援不至。永順總兵劉安邦力戰死。軍亂。夷勢益張。適水西土目安如鼎遣人偵黔營虛實。爲本深所獲。始知滇兵被困。乃使爲鄉導。鼓勇進兵。副將白世彥手斬夷目。以罵於陣。以罵者坤之驍將也。旣斬。夷衆遂潰。總兵李如璧亦率精兵直入。兩路兵始合爲一。旣敗之於阿作峒。又敗之於初得峒。九月。又敗之於紅巖峒。坤率其妻祿氏奔木弄箐。由烏撒至烏蒙。烏蒙不納。坤遣漢把會經。費印請降。三桂不許。分兵追擊。生擒坤於大方之杓箐。十月。又擒皮熊於烏撒。皮熊時年八十餘。面責三桂。三桂不能答。絕食十五日而死。水西平。三桂請建郡。疏略云。水西古號羅甸鬼國。相傳始自唐堯。明王守仁辨爲傲象遺裔。至漢浸大。歷唐宋元明之世。日益強大。諸郡莫不凜承順旨。於滇爲咽喉之病。於蜀爲戶牖之狼。於黔爲腹心之蠱毒。明天啓年間。蠻長安邦彥構難發端。遂因黔一載。城中殺人爲食。市坊壘骨如山。酋首西寇馬龍志欲洗兵滇海。東抄遵永。更圖牧馬成都。是時六詔如坐井中。聲氣經年永絕。滇人不得已之計。乃請開間道粵西。往事之害如此。顧當年曾調六省士馬。費千百萬金錢以剿。先後二十年。竟未能克。今者渠魁旣斃。黨羽全芟。設流之制。請得陳之。議照滇黔十郡提封。要不過中通一線。此外皆生苗部落。故以水西截長補短較之。約敵全黔十分之六。今裂其土以爲郡。撫其民以供耕。可增如許軍糧。聊佐公家萬一之計。卽黔之爲省。亦得以稍展幅員。是向之害黔者。今日

益黔矣。查水西地有十一則溪。度量延袤之形。其地可置四府。數十州縣。但恐經大創之後。人民死損甚多。可先設三府。以試其治。擬將隴勝的都塚你阿架四則溪。設爲府。建府治於比喇。將法戈大著木膀架勒四則溪。設爲府。建府治於水西城。各領以流官知府。悉隸貴州布政司。原設分巡畢節道。原以控制土司。今水西已平。應將該道。改爲整飭三府分巡貴寧道。兼管寧永赤畢等衛。駐劄比喇。比喇一府。設推官一員。承理三府刑名大案。俾有責成。再所設三府。不便以比喇大方水西爲稱。宜改新名。三桂疏。載南昌劉健庭聞錄。其書未刊。傳寫多訛舛脫漏。按貴州通志。康熙三年。安坤與烏撒土知府安重聖。謀反。討平之。以水西十一則溪地。設三府。以大方爲大定府。木膀火着架勒化各四則溪屬之。以水西爲黔西府。則窩以着雄所三則溪屬之。以比喇壩爲平越府。的獨朵你要架隴勝四則溪屬之。則溪。羅鬼語。猶華言唐之州。宋之軍也。改烏撒爲威寧府。

錢邦芑。字開少。丹徒人。官都察院。初由閩至粵。旣由粵至滇。滇破。祝髮雞足山。號大錯和尚。三桂子應熊省親。遇之於貴州道中。出語不遜。應熊執之。以見三桂。三桂笑曰。是欲辱我以求死所耳。吾兒正墮其計矣。命亟釋之。

癸丑年。三桂反。十二月。貴州兵譚總督甘公文焜。自度不能支。謀東扼鎮遠。初八日。至鎮遠。知府張維堅。副將江義。先已受逆命令。阻公毋東。兩人猶豫不決。有守備某者。以考試懷恨。力勸從賊。且自請阻公。公之未顯也。曾問終身於朱山人。山人曰。一路功名到吉祥。公被阻。遂巡度橋。見吉祥寺。愕然曰。前定矣。遂

縊。子某筆帖式雅圖華善從死。兵部郎中黨古里。戶部郎中席蘭泰。戶部員外薩木哈。兵部主事幸桂先。在貴陽爲三桂夫馬芻糧備。反聞至。黨古里等馳出。赴京上變。惟桂先不及行。與筆帖式薩爾圖俱爲李本深所害。三桂至貴州。以本深爲貴州總管大將軍。巡撫曹申吉先削髮遁。召見。與潘超先張文德等俱以原官用。次年正月。至鎮遠。

三桂死。吳世璠僭號。至貴州。舉會試。以陳循爲一甲第一人。循修文人。

四川提督王之鼎。援永寧。賊衆我寡。被圍數匝。三閱月。糧盡援絕。賊以火藥轟城。陷之。鼎被執。自刎不殊。昇至貴陽。夏國相等說降。不從。被害北門川主廟前。同時死者總兵何成德。王永世。劉奎。傅汝友。副將楊玉虎。傅富。遊擊陳田。陳先鳳。兆藏保。劉應科。從征廕生潘濟世。從征立功陳應科。十二人。

二十年。世璠還雲南。大兵鼓行而前。僞將軍韓天福拒戰平越。敗績。世璠遂遁。僞大學士郭壯圖。遣線緘援黔。拒戰江西坡。提督桑格前鋒陳珀中礮。不能軍。將士損傷過半。大敗。其實與賊未交鋒也。江西坡山崇隆險峻。曲折盤旋。繞山而上。如螺紋然。賊負山險。以象迎戰。我師見象出。卽驚潰。蔡毓榮遣紅旗督戰。衆崩不可止。紅旗亦不返。兩日夜方止。死屍山積。大約死於賊者十之二三。顛踣死。踐踏死。捷足者先奔。奔者繼至。繆謂追兵自相格鬪。殺死者十之六七。今坡下犂鋤間。往往猶見白骨也。是役也。我兵雖挫。諸軍繼進者日衆。線緘不能支。棄險西走。僞將軍何繼祖等。扼黃草壩以守。而征南大將軍賴塔。偕都統勒貝。都統希福馬齊趙連。護軍統領額黑里。副都統洪實錄。祖植椿。兩廣總督金光祖。福州將軍馬九玉等。

由泗城州奪石門坎拔安籠所繞出賊後遂大破之。

王四者吳商也特三桂勢在貴州所爲多不法總督甘公治其罪逐之出境盡反所奪廬舍子女三桂不能留也以上七條載庭聞錄

蔡毓榮平南記略載其統兵入黔也曰康熙十九年四月丁丑賊望風宵遁我師會次沅州廣樹先聲徧爲招撫將略思南徇銅仁取石阡出印江攻塘頭出思州奪老烏溝以乘勝入黔而羣賊力守鎮遠夫鎮遠固黔中一咽喉地也駐沅以來糧充器銳士馬飽騰十月甲午師次周倉坪賊憑高恃險抗衡如舊丙申分兵三路一由秀地取石卷巖門一由鎮遠縣旁出攻其腋地而予帥官兵正擊其面賊不能支是夜漏下五刻各亡命去我兵追殺過油柞關偏橋至興隆而止壬寅師次重安江癸卯進清平近地賊營聞風解散十一月辛酉全師駐貴陽先鋒抵安順惟鐵索橋江勢湍激巉巖層立浮渡萬難賊焚橋負嵎以冀復振己巳我軍飛渡仰擊大敗賊兵所謂要害之處咸我有矣行師至此我馬疲敝稍爲養息二十年師至安南至沙子哨與賊大戰於江西坡轉鬪而前得臘笳坡賊敗走收新興普安其諸郡縣皆歸順威寧多鉛廠舊礦產鉛不旺且每歲夏時中多積水車戽之費較昔日增又從前官鑪不足則買商鉛以補之商先領官本從容繳鉛頗以爲利故樂於輸送今則發價漸少輸官之餘無多利息商鉛可買者稀官鑪所得不足使公項盡歸實用猶患費用之繁倍出半入而奸胥蠹役欲借開廠爲名飽其私橐者更甚於前運務之壞較然可觀也每歲四運京鉛一運楚鉛恐其弗給勢必議開子廠但此事非可促辦向

來產鉛之地。土人視其可開。具呈報州縣官。批准。令其自備資本開採。一年有效。然後州縣官申報官辦。一年有效。然後申請領官本。經理必三五年。乃有成局。如未開之地。聽商人言。其有鉛可採。遽發官項與之。則一年無效。或不甚旺。便已賠累巨萬。州縣官豈肯爲之。卽富商大賈。其取利之途甚多。亦不樂於一試也。故子廠之說。亦屬迂緩難行。誠使司事者。能以數萬金之美缺。不肥己囊。嚴禁吏胥家人侵漁諸弊。於現採之礦。設法經營。實力辦理。多招商人。擇其可信者。先發官本。令其陸續交納。則於運務廠務。兩無貽誤。如廠中常有三年之餘。何虞誤運哉。新開子廠。入礦不深。可省腳費。亦無辱水之勞。仍聽商民自報自開。悉如舊制。多一處不爲無益。但目前所急者。不在此耳。

鉛廠中亦多可怪者。商民開礦。視其命運。有見鉛苗。並得其穴。而勞苦經年。費用巨萬。而無所得者。礦中或沙或水。開閉不常。此亦陰陽之理。不可測耳。有富者買一山。鳩工開鑿。入其中。無有也。視其苗。則決必得之。於是罄家貲。親往督理。貲盡矣。乃持鎚向石而咒曰。我爲汝亡家。今與汝并命矣。鎚落石破。而鉛出。就其穴採之。復其財。而穴乃罄。又有兄弟二人。共開一山者。山有兩穴。其弟先私開之一。有鉛。一無鉛。乃與兄鬪。兄得有鉛者。夜半往掘。取其鉛置己穴。而以己穴之土石。置兄所鬪得處。旣開礦。弟乃陽言曰。兄之穴皆土石。願以弟所得者讓兄也。兄曰。吾與弟均耳。弟曰。否。遂互易其礦。及開數日。兄礦益旺。而弟竟銖兩無所獲。

每鉛一爐。或白金一塊。或數錢。或一二兩。啓爐時。工人必合聲痛冒曰。汝速死。汝速死。冒不絕。而啓之。則

一餅躍出弗嘗。則無所得。金之畏嘗乎。好嘗乎。雖有智者。莫能喻其故也。

興義守某。有婢死而埋之。數日。過其處者。聞棺中有哭聲。走告某守。出之復活。

永寧州署。三堂有鬼。蓋州牧某。杖斃其妾婢三人。瘞於堂之後。每爲祟。今州牧。別爲室數楹。於二堂之東。偏以居。而以三堂爲驛館。過客宿焉。知者。多移宿於城南二十里之新鋪。然其地湫隘不可居。余往興義。去來皆住州署。僕輩畏甚。點燈後。俱逃往主人閤者之所。余與幕友李鄴芸。楊擴荃。飲酒縱談。至更餘就寢。天明乃起。毫無所見聞也。堂三楹。余獨寢東一室。鼾臥如常。而李與楊。同處西偏。竟夕不能寐。

藩署修屋。毀舊垣及半。得盜盃一。缺其邊之半。安置甌土中。盃貯茶油滿焉。莫測所由入。遂止不毀。夜有宿其旁者。燈下見巨鼠。一自背至尾。皆油沾濡。就盃缺處。刮其油。注於盃畢。乃去。少頃復來。刮如故。乃悟垣中舊有一盃鼠。每夜就油餅。以身漬油來刮之。蓄以爲糧者也。福方伯親告余。余謂此鼠。智則智矣。願垣已毀。而猶不知。又何其愚也。

省城一女子。父母歿不嫁。豪俠善騎射。獨處一室。時或反鍵其戶。匹馬男裝。遊湖湘間。人不識其爲女也。數月歸。則閉戶不出。精於刺繡。得遊費。則又躍鞍出郭。不知所之。幕友李鄴芸爲余言。鄴芸曾見之。隣居不敢與言婚者。亦不知其姓。

貞豐州羅斛册亭。皆多瘴氣。人病瘡者多死。江西之賈於羅斛者。必經三瘡。乃可保。有賈某姓。已十八病矣。

俗稱妻父爲泰山。以有丈人峯也。因此遂稱人妻母爲泰水。更可噓者。謂人妾父爲邱垤。妾母爲行潦。黔中納寵者。母必隨以來。久則驕恣。詬誶之聲。不可聞也。試用令某在黔納姬。其母頗悍。時爲所窘。令與余善。余於端午日。在黔西道中。遇驟雨。山水陡至。幾被漂溺。及返會垣。令迎於道旁。慰曰。別來無恙乎。余曰。惟天中節。爲行潦所虐耳。令大笑。

黔人生小兒。多寄人爲乾子。呼其義父曰保爺。至有寄於巨石者。於石上鐫其兒名。呼之曰石保爺。

諺云。清平豆腐楊老酒。黃絲姑娘家家有。今清平縣豆腐尙佳。楊老土司城。有白石數枚。立於城南。頗奇峭。而酒則甚薄。黃絲去平。越四十里。爲官路所經。有數百家村落。較他處略整潔。而當壇冶豔。殊未見之。蓋風化之轉移久矣。

諺又云。大定水城女如花。黔西兒郎賽過他。畢節姑娘家家好。惟有威寧苦蕎粇。蕎粇者。以蕎麥麵爲粇。言其黑。威寧地瘠。人皆食蕎。故云。

鄒小山一桂。自作楚黔山水畫冊。筆墨精妙。題句皆關考證。鷄公嶺詩云。山行屢霖是晴天。牛背兒童帶雨眠。此日青疇喜霽足。數峯烘出米家顛。誰將潑墨嗣前蹤。遠近煙巒試淡濃。我是九龍山下客。短歌多半雜吳儂。涵碧潭卽城南甲秀樓詩云。休誇辟棘自唐蒙。

聖代車書夾粵通。陶逕娛賓聊暇日。庾樓成唱續高風。捲簾花色三秋候。憑檻霞光萬嶺中。試跨雙虹看題柱。袞衣今日正思公。樓前有鐵柱記西朗照如君眞月鑑。餘波贈我亦天紳。偶於黔地歌三疊。並想燕

臺少一人。薄宦自憐增白首。亂山猶喜隔紅塵。回瞻帝闕無多別。遙約梅花綻早春。戊午九日登甲秀樓送阮主試卽依贈韻

照壁山云。山勢裁成幅。帆開未見舟。遊人常面壁。落日好登樓。萬井容窗隙。千峯插案頭。率然環雉拱。卓爾畫扇秋。拂薜尋題句。憑欄恣遠眸。嘯空宜舞鶴。飛杖欲乘虬。新月城笳動。疎鐘梵唄幽。歸來衫袖重。攜稿上鳴鷗。題東山十二景。和潘橡亭元韻八首云。青歸楊柳枝。紅入桃花面。獨有歲寒松。春來自不變。踢閣上層顛。忽然身入海。擬作幻蜃觀。洶波成鬢髮。山居看朝日。飲露還餐霞。蔚然藍幕間。爛漫垂天花。雨來聽其鏗。風度有餘響。銅鼓本無聲。千秋自靈爽。卓立一屏開。螺黛千松點。蒼翠佛頭深。紅塵豈能染。深柳亂紅橋。澄波挂天影。何來南海潮。吹上西風嶺。翠竹蔽蒙茸。白雲穿宵窳。提筇入行行。清風散炎歊。竈火猶未明。梵唄生虛室。庭樹何蒼蒼。回頭見落日。石阡云。孤標凌太虛。受氣變霜雪。叢木不能附。點綴辭一切。稜稜表寒谷。子子挺高節。山爲仁者樂。毋乃太勇決。那知堅壁中。泉脈出自穴。虛中涵智水。流潤生膏澤。外樸內文明。此圖可觀易。豈徒誇石笏。椽筆書天闕。白水河云。吾吳富水黔。富山有山無水山。不活深林祇覺嵐氣重。多穴饒與狐兔窟。十里一窟泉。五里已成渴。涓涓伏流山。草沒縱有清駛無人撥。轉岡忽聞萬馬聲。荒山鐘鼓何鏗鏘。遙看始見白一線。匹練晝暴妖虹橫。兩旁水氣浸石壁。濺跳碎玉煙霏輕。天紳長垂不可卷。白竟歸壑山風鳴。觀瀑亭中頓忘乏。馬芻僕飯遲行旌。山靈怪我笑枯渴。獻此血脈流其精。華峯蟻穴昔曾到。莫炫怪異欺先生。飛雲巖云。黔中跬步皆巒岼。籠煙接霧如星攢。連晨陟降疲征鞍。苦對童阜無奇巒。茲巖腹豁誰所剜。流膏垂乳出肺肝。淋淋漓漓狀千般。虎豹蹲立蛟龍蟠。青虬玉蛻

牽素縈蓮花。倒放零露溥。旌幢華蓋何靡曼。一峯參禮對面看。檻外珠玉飛來湍。月潭疎磬應谷寒。松杉百道清蒲團。我遊心曠足力酸。怪此山破精神完。山僧常住無驚歡。具相非相隨人觀。相見坡云偏橋橋東相見坡。行人聽見苗子歌。吹蘆大踏月皎皎。搖鈴暗拍聲鳴鳴。前坡草長苦雅務。田山燕黔書雅務苗言難行也後坡石滑愁商訛。言放牛阿李苗呼阿交飲酒在前店阿蒙苗呼歹鷄坐也方陟巘。回頭相見不足奇。去去忽然還對面。山坳固麥喫飯謂之固麥趁泉流。山前果瓮行路謂之果瓮人不休。鶻啼鷓叫。颯風秋。辰溪云。凹字城頭丁字溪。沿溪水關巨高低。朝來盪漿和風裏。不是桃源亦自迷。一路花枝間柳枝。客來剛是早春時。好山只合船頭看。若在城中恐未知。幫洞云。三壺在海表。風烈不能舟。秦皇覓不見。漢武將焉求。物理近可譬。此山卽神洲。鴻濛未歸壑。激盪成雕鏤。一朝變桑田。陸海膠浮鷗。宛如白蓮朵。出放含清秋。上結寶花臺。疎磬鳴松楸。得非壺公宅。如此邀浮邱。盤旋轉蝸舍。往返周華不。蜂腰附蟻蝨。蝻領飛蜉蝣。對岸立鋒戟。冠纓矚兜鍪。登湯湯濯古礎。底柱滄溟流。雀蛤以時變。夔虺憐其儔。女知吾不化。鼓翅隨莊周。天柱縣云。喜得兒童滿手誇。遍山穠豔勝桃花。似應風急延春燒。瞥見波明誤晚霞。別有洞天開絳帳。始知黔地盡丹砂。遐荒近得陽和溥。萬笏參雲耀日華。白註天柱雄傑皆樓水通楚澤春夏間鵝花偏山繞澗綠流紅翠上下俗謂之滿山紅四面青山四面樓。一樓高出衆樓頭。雨餘遙見清江路。欲趁長風駕兩虬。喜得齊雲倚日開。不愁前去有崔巍。何人便說南天柱。我亦蓬山頂上來。雪厓洞云。劔崖營傑閣。突兀俯城隈。曲磴盤雲上。朱櫺耀日開。遠煙清瘴嶺。秋色在樓臺。隱約聞笙鶴。仙人自去來。元洞何年闢。穿幽透碧穹。暗苔侵古佛。落木響晨鐘。壁淨塵難到。龕深膝可容。有人

誇白雪。題詠最高峯。辛酉秋深。又當瓜代。諸公設餞於此。又題云。着破登山屐。朝來得勝遊。雉環千堞峻。虹護一溪流。漁艇晴波暖。霜楓落照秋。碧雞何處覓。咫尺是丹邱。筇竹枝爲友。牂牁月是家。六年邊地客。一席小春花。倚檻臨清瀨。停杯看落霞。遙程計歸雁。萬里愧星槎。序云。一桂以雍正乙卯奉命督黔學。隆冬就道。逾大河。歷江漢。朔風欺鬢。未暇觀覽。丙辰春抵湖南。泛舟沅江。花柳爭媚。沿流峭壁。頗覺動人。乃稿而笥之。俟暇欲爲圖。以嗣粵遊之冊。旣入黔。則萬山穿雲。巖壑厓洞。稱奇勝者不一而足。顧以巡試。匆匆未暇。及戊午冬期滿。作楚黔十二景一冊。友人爭題之。方伯雁門馮公見而攜去。再索一觀。不可得。嗣又蒙恩留任三年。重經所過。如遇舊知。然欲圖之。卒無其隙。壬戌還京師。從禮垣涼秋夜直。宮漏方永。靜憶在黔六載。披荆涉險。如在夢中。而林壑在胸。不能去。乃追而圖之。得景十二幀。譬如夢醒說夢。而誕幻不妨姑聽也。嗟乎。卽以山水論。圖中所列者。可謂旁人未諳。奇特如圖中者。豈少哉。不遇知己。過而輒忘。已爾。在山水固無求。亦無憾也。然人不觀山水。山水日起。而觀人人之往來於黔山者。豈少哉。是冊也。余將以之爲伯牙焉。故題之曰。山水觀我。乾隆八年七月旣望。錫山鄒一桂書於獨樹軒。小山此冊。於道光三年爲卓海帆少京兆所得。海帆觀余黔中記。遂以贈余。因全錄其冊中詩文。以資考證。